

JAORGANK 18 - 2024

# de Uulbewapper

OETGAVE VAN SJTADSVASTELAOVESVERENIGING D'N UUL REMUNJ



## Dean I Adams



JEUGDPRINS D'N UUL 2024

## Leef UULKES EN UULINNEKES EN ALLE ANGER HENJER OET GROOT REMUNJ,

Geer höb 'm in eur henj! De boemvölle Uulewapper 2024! Veer höbbe weer keihèl oos bès gedaon óm de sjoonste verhaole veur uch te make. Zo kómme Big Benny en Danny Pouwels aan 't waord, veer naeme uch mit in de gesjiedenis van't Sjapsnazebal en wis geer bieveurbeeld det ze zelfs in Frankriek en Amerika vastelaovend vierie? Nae? Den laes mer ins rap wiejer.

Ouch höbbe de Uulejónges groot nuuts en zeen d'r weer inkele nuuj maedjes bie de gardes gekómme. En zo wie eder jaor is d'r weer genóg aandach veur

de nuje Sjadsjeugprins van D'n Uul. Want veer kinne ós zo veursjtelle det geer waal wilt weite wat zien hobbies zeen en wat ziene sjpreuk is. Kórtom: veer winse uch heel väöl laes- en vastelaovespleezer!

### De riddaksie Uulewapper

P.S. Bie inkele sjökskes zólt geer ouch QR-codes zeen sjtaon. Es geer die code mit 'ne QR-scanner op de smartphone scant, kint geer online nog meer bekike en beloestere euver det óngerwerp.

## BEZORGING DOOR SCOUTING SINT HUBERTUS EN SCOUTING REGIO ROERMOND

Ouch dit jaor höbbe de jeugleje en vriewilligers van Scouting Sint Hubertus en Scouting Regio Roermond de Uulewapper en Zjwetskammezaol aan de deur gebracht. Veur de bezorging op inkele doe�ende adresse zeen teentalle vriewilligers bereid gevónje.

Extra trots zeen veer op de inzat van Scouting René Höppener, wo bie scouts mit 'n beperking helpe bie de versjpreijng van de Uulewapper en Zjwetskammezaol. Veur de leje van Scouting Sint Hubertus woor 2023 'n bezunjer jaor wo in 't 60-jäörig jubelijem plaatsvónj. De leijing mer vooral de jeug zeen den ouch gedoerende 't jaor getrakteerd op extra activiteite en 'n wiekendje weg.



Es geer noe eder jaor de prachtige Uulewapper en Zjwetskammezaol mit ouch de Uulepin van 't jaormotto van det jaor op de deurmat wilt, maak uch pappa's en mamma's dan gans gek om uch lid van D'n Uul te make en kom ouch bie os Uulefemielie. **Veur € 22,- per jaor zeen volwassene lid of veur € 11,- per jaor bösse jeuglid van D'n Uul.** Dan profiteert geer geliek van álle veurdeile van ein Uule-lidmaotsjap.

## Oze eigese Ceryll van de Prinsekepel wint glansriek de eerste edisie van KUUL!



Zónndaag 5 november 2023 waas de eerste edisie van KUUL. KUUL sjteit veur 't Katers-Uul-Leedjessjpektakel. Det is de leedjeswedstried van de Vastelaovesvereniging De Katers oet Neel en netuurlik Sjadsvastelaovesvereniging D'n Uul. Net es mit 't LVK waerde in 'n sjpannende finale bekind gemaak welk leedje 't beste waas.

't Is zónndaagmidaag elf minute veur twee en de zaal sjtruimp al lekker vol. En det is mer good ouch, want 't pergram geit beginne. De bekinde Remujse muzikant Hub Boesten en zien bend sjpele al get leedjes om de sjtumming d'r in te kriege. Den bars 't sjpektakel eindelik los. Hie en dao gaon al get hendjes in de lóch. De grótste fans höbbe zelfs sjpandeuk gemaak womit ze vol entoesjasme sjtaon te zjweije.

### Oze Ceryll geit d'r vol veur

Zelfs de pauze sjteit in 't teike van meziek. De prinsekepel van De Katers is waal mit 2x11 man bie-ein gekómme en veurdet ederein 't wét tróete zie alle bekinde vastelaovesleedjes. Mer den kump Ceryll op 't podium. Hae dans en sjprink esof zien laeve d'r vanaaf hink en krieg de ganse zaal mit in zien optraeje. Ederein klap, juich en fluit op zien vingers en waert kóplete weggeblaoze. Es de lèste noot gesjpeeld is, brik d'r ein oorverdouwend applaus los. De decibelmaeter aan 't plafond geit van greun nao gael en rood, zo hèl waert d'r geklap. En det terwiel de lèste leedjes nog mótte kómme...

### En de winnaar is...

Es alle optraejes zeen gewaes, geit de zjurie in euverlig en moog 't peblek vieja ein QR-code häör sjtum oetbringe. Öngertosse zorge de bëste muzikante van de prinsekepel van D'n Uul veur de meziek.

Efkés later is de oetsjlaag bekind. Oze Vórs Dirk reup de winnaar nao veure. En det is gewaore... CERYLL! D'r is haos nemes dae 't dao neet mit ins is. En Ceryll zelf? Dae kump op zien gemaak 't podium op wo hae ziene pries in ontvangst nump. Hae moog optraeje op de 11evande11e! Nao bienao drie oer en elf minute kump de muzikale midaag aan häör inj, mer absoluut neet veurdet Ceryll ónger luid gejuch nog eine keer zien leedje haet gezónge.

En zeet geer noe nuujsjierig nao 't leedje van Ceryll? Vraog den aan pap en mam of geer mit moog nao de Sjtasiefestasie op vastelaoveszaoterdaag, want ouch dao moog Ceryll zien leedje ten geheure bringe!



# Vastelaovestied is Dean tied

Vastelaovestied, is Dean tied! En det is 't zeker. Nao jaore van oefene mit de vastelaovend en wie Dean 't zelf zaet "Eindelik geit 't gebeure!". Op 't kienjerdaagverblief 't treintje zoge ze al flot det Dean 'n vastelaoveshert had en hae gaer es prins verkleijd waerde. Ouch es hae op joets ging mit zien elders dan droog hae det prinsepak. Sinds zie vader Marnix I Adams sjadsprens is gewaes in 2017, is det geveul om prins te waere allein maar gegreujd. Dit is veur Dean dus ech 'ne druim dae oet kump.

't Nuje prinselik gezelsjap is bekind en wo angers es bie Braam treffe veer ós om dit stök te sjriewe. Boete det de vader van de Sjadsjeugdprins de aad oetbater van café Braam is gewaes, is 't ouch 'n plek wo ze same de vastelaovend höbbe lere viere. Zo wie ze't zelf vertelle kinne ze bie café Braam häör eige plan trekke. De elders sjtaon aan de gaam en zie in de kroeg, oppe beugelbaan of boete kuite mit vrunj.

Sjadsjeugdprins, prins van d'n Uul, Dean I is gebaore in 't Lerang op 2 augustus 2012. Veer kinne waal sjittelte det Dean is opgegreujd in 'n echte uule femilie. Zien vader is Marnix I Adams, hae waas Sjadsprins, prins van D'n Uul in 2017 en veurig jaor de adjudant van Sjadsprins Spencer I. Opa, Karel Adams, waas adjudant bie Roel I (1979) en ziene euvergroot opa is Grootmeester van D'n Uul. De moder van Dean is Sylvia Lensvelt, de sjtille kracht op de achtergrondj. Dean haet nog ein zöster, die ouch ein verleje haet biej D'n Uul. Zoë is ein aantal jäörkes dansmarijetje bie de jeuggarde gewaes.

**Wils se meer van Dean I. of zien adjudante, te weite komme?  
Blajer dan flot door nao 't vastelaoves vrunjebok!**

Dean haet twee adjudante gekaoze en det zeen gooij vrunj van hem. 't Biezongere is det de adjudante waal eine goje bandj mit Dean höbbe maar zich veur deze vastelaovend nog neet kóste. **Mees Wagemans**, zoon van Maarten Wagemans en Saartje Zijlstra, en Dean kinne zich al vanaaf kleins aaf- aan en höbbe same häorre 1ste vastelaovend in de kienjerwage oppe kade gevierd. Ouch voetballe ze same biej SHH in JO12-1. En wie sjoon is 't det de gesjiedenis zich herhaolt, want de vader van Mees, Maarten Wagemans, waas adjudant bie Marnix.

De tweede adjudant is **Ada Yarimbay**, dochter van Tulay en Harun Yarimbay. Dean en Ada zitte in dezelfde klas op de Steine Brök en höbbe aan ein waord genog om zich te begriepen, of... de klas op sjitelte te zitte. Ónger dit gesjprek zeen de twee jonges al aan 't sjuttere van de sjpanning en Ada, heel relax, haet alles ónger controle.

't Gezelsjap is drök bezig mit de veurbereijinge maar kint neet wachte om oetgerope te waere. Dan kinne ze eindelik häör geheim aan Remunj

vertelle. Ze weite good welke ivvenemente gaon kómme. Vraoge zo as: " Wie zól 't Sjtasieplein vanaaf de bühn d'r oet zeen?" en "is ter waal genög sjlók óm oet te goje mit de optoch?" gaon róndj in de köpkes van oos nuuj veurgengers.

Sjpecial is det Roland, de ome van Dean, de hoesorde haet óntworpe. Same mit ziene pap haet Dean d'r ein sjoon hoesorde van inein gefiespernuld. Netuerlik is 'ne uul in 't óntwerp te zeen maar ouch Remunj en 'n verwiezing nao de sjpreuk van Dean I.



## Vastelaovestied is Dean tied



Scan mich

# Vastelaoves Vrunjebóok

Miene naam:

Dean

Miene laeftied:

11 jaor

Mien breurs en of zösterkes zeen:

Zoe

Ich zit in groep:

8

Mien favoriete sjoolvak is:

Geschiedenis

Miene favoriete app is:

YouTube

Favoriete superheld:

Iron man

Dees superkrach zól ich gaer wille höbbe:

Vliegen

Favoriete vastelaovesarties is:

Rowwen Hèze

't Sjoonste vastelaoves ivvenement is:

Optocht



Waat geisse keeze?

- |                   |    |                     |
|-------------------|----|---------------------|
| <u>Sljók</u>      | of | <u>Sjips</u>        |
| <u>John Tana</u>  | of | <u>De Roerdasse</u> |
| <u>Gamen</u>      | of | <u>Sjporté</u>      |
| <u>Oetrope</u>    | of | <u>Optoch</u>       |
| <u>Uule jónge</u> | of | <u>Dansmarietje</u> |
| <u>YouTube</u>    | of | <u>Netflix</u>      |
| <u>Confetti</u>   | of | <u>Serpétines</u>   |



Miene naam:

Mees

Miene laeftied:

12 jaor

Mien breurs en of zösterkes zeen:

Isis en Doris

Ich zit in groep:

8

Mien favoriete sjoolvak is:

Geschiedenis

Miene favoriete app is:

YouTube

Favoriete superheld:

Captain America

Dees superkrach zól ich gaer wille höbbe:

Gedaanteverandering

Favoriete vastelaovesarties is:

Vleisboeket

't Sjoonste vastelaoves ivvenement is:

Optocht kieke mit familie en vrunj



Waat geisse keeze?

- |                   |    |                     |
|-------------------|----|---------------------|
| <u>Sljók</u>      | of | <u>Sjips</u>        |
| <u>John Tana</u>  | of | <u>De Roerdasse</u> |
| <u>Gamen</u>      | of | <u>Sjporté</u>      |
| <u>Oetrope</u>    | of | <u>Optoch</u>       |
| <u>Uule jónge</u> | of | <u>Dansmarietje</u> |
| <u>YouTube</u>    | of | <u>Netflix</u>      |
| <u>Confetti</u>   | of | <u>Serpétines</u>   |



Miene naam:

Ada Yarimbay

Miene laeftied :

11 jaor

Mien breurs en of zösterkes zeen:

Ece en Sila

Ich zit in groep:

8 op basissjool de Sjteine Brök

Mien favoriete sjoolvak is:

Sjelling

Miene favoriete app is:

Roblo

Favoriete superheld:

Black Widow

Dees superkrach zól ich gaer wille höbbe:

Telekinese

Favoriete vastelaovesarties is:

Vleisboeket

't Sjoonste vastelaoves ivvenement is:

Sjolefestatje



Waat geisse keeze?

- |                   |    |                     |
|-------------------|----|---------------------|
| <u>Sljók</u>      | of | <u>Sjips</u>        |
| <u>John Tana</u>  | of | <u>De Roerdasse</u> |
| <u>Gamen</u>      | of | <u>Sjporté</u>      |
| <u>Oetrope</u>    | of | <u>Optoch</u>       |
| <u>Uule jónge</u> | of | <u>Dansmarietje</u> |
| <u>YouTube</u>    | of | <u>Netflix</u>      |
| <u>Confetti</u>   | of | <u>Serpétines</u>   |



— Proklesmasie —  
veer

# DEAN I

Sjtadsjeugprins van Remunj

Bie de gracie van Sjtadsvastelaovesvereniging D'n Uul  
in 't jaor 2024

Gebaore in Remunj es echte Remunjse jong, zoon van Aad Sjtadsprins van Remunj,  
en aad adjudant Marnix I en Moder Sylvia. Breurke van Zoë.

Dit jaor ongersjeund door mien gooijruijen adjudante Ada en Mees.



Oes famelic t' nao nie Adjudant Bacchus en 'ne Sjtadsprins tieb vonj veur 'ne Sjtadsjeugprins.

Veer des dag mit alle leefde en plezeer de scepter priffereere  
baove de controller.

Veer altid wakker gemaak moge waere veur ein frietje may.

Ich van kleins aaf aan al roop: "Poem, Paaf, Alaf, allemaol de kop draaf!"

Veer gein baeterie tieb kinne bedinken es Vastelaovestied mit Dean beste vruij.

Veer onger Vastelaovestied de voet bal-en hockeysjoon gaer inrule veur laksjoon.  
veer van meinung zeen dat zo wie t klökske in Remunj tik, tik t nörjes.



Veer, wie klein veer ooch nog zeen same de grootste lol höbbe.

Veer alle drie eigelik geweun plat kinne kalle mer det bewaard höbbe toet dit moment.

Ich naeve de Wientwien en de Donderkwit ooch van de band Queen haaj.

Veer oos elders altid heure zegke; Nog eine en dan...

Opgeteikend en besjpraoke in Remunj onger os en onger oce liefsjprauki:

op 14 jannewarie 2024;

Vaste(s)aoVestied, is DEAN TIED!



# GALERIE VAN (AAD) SJTADSJEUGPRINSE MIT HÄÖR ADJUDANTE



2020  
Cas I mit adjudante  
Tijs en Keane



2023  
Jimi I mit adjudante Tijl en Sam



2022  
Joep III mit adjudante  
Arthur en Celeste



KIEK VEUR DE FOTO'S VAN  
DE AAD SJTADSJEUGPRINSE  
EN HÄÖR ADJUDANTE EN  
OUCH VEUR DE INTERVIEWS  
OP WWW.DN-UUL.NL



# Leef Uulekienjer, Uulejeug en alle angere jeugdige laezers,

*Yes eindelik; de Vastelaovend geit noe auch veur de Uulekienjer, de Uulejeug en alle anger kienjer en jeugdige oet Remunj weer beginne. In 2023 hóbbe veer al oos jaormotto veur dit sezoen oetgekaoze, ‘Nog eine en dan...’. ‘t Motto is bedach door Norbert van Dooren, senator van D'n Vul. Marjo Peeters, jao dezelfde Marjo die auch mit de Uulewapper inein haet gefiespernald, maakde ‘t óntwerp veur de biebeheurende jaormedalje. ‘t Is auch ‘n sjpesjaal jaormotto ómdet d'r sjiekem al ‘n bietje veuroet waert gekeke nao 2025. Det waert ‘n bezónjer jaor ómdet D'n Vul dan ‘n jabeleijem viert en 8x11 jaor besjiteit.*

Mer veur de kienjer en jeugdige gebeurde ‘t allerbelangrikste op zónndaag 14 jannewarie. De kemissie die veurig jaor veur ‘t eers de ivvenemente veur de Sjadsjeugprins organiseerde, neume veer noe de kemissie Jeugprins-feesjes. Zie organiseerde ‘De Middaag’ noe dus veur de 2e keer mer haje aevegood ‘ne primáör! De Oranjerie is nao de verboewing weer helemaal klaar en d'r zeen nuuj aafsjprake gemaak. D'r waar in de theaterzaal ‘n sjieke en bezónjere ambiance gemaak door de kemissie same mit de Oranjerie, mit ‘n sjpesjaal thema van superhelden en ‘ne grote verrassingsact. Naendet de sjpanning good waerde opgeboewd toet de allerlèste sekónde sjting hae dao mit ‘n magische versjiening obbins; **Dean I Adams** waerde toet de 56e Sjadsjeugprins van Remunj en Jeugprins van D'n Uul geïnstalleerd. **Ada Yarimbay** en **Mees Wagemans** zeen door **Dean I** es adjudante oetgekaoze en zie gaon same mit zien drieje de kommende waaeke de tied van häör laeve belaewe. Ziene Dórlöstige Hoogheid **Dean I** geit ós veur ónger ziene liefsjpreuk ‘*Vastelaovestied, is Dean tied!*’.

Noe kinne veer de Vastelaovend mit vertroewe veuroet zeen ómdet ein waek eerder op zaoterraagaovend 6 jannewarie, wie alle Uulekienjer netuurlijk al lekker loge te sjlaope, de Remunjse Sjadsprins van 2024 is oetgerope. Nao zien oetroeping, auch in ‘ne gans nuje opzat in de theaterzaal, waerde **Joep I Seuren** toet 79e Sjadsprins van Remunj en Prins van D'n Uul geïnstalleerd. Mit zien adjudante **Ruben Kuijper** en de Sjadsprinselike breurs **René Seuren & Pieke**

**Seuren**, sjting Ziene Dórlöstige Hoogheid sjtraolend en sjpringend op de bühne. Ziene Dórlöstige Hoogheid **Joep I** geit ós veur ónger ziene liefsjpreuk ‘*Neet toete, blaazel!*’. Mit ‘n sjiek en entoejas Jeugprinselik Gezelsjap en biegesjtaon door ‘t Prinselik Gezelsjap, kieke veer oet nao alle ivvenemente en aktiviëteite veur de jeug en kienjer. Aan alle kemissies die alles veur de kienjer en jeug meugelik make ‘ne chapeau want zónger uch kinne de kienjer en jeugdige neet feeste, merci!

Same mit de **Kienjergarde, Jeuggarde en Uulejónges** waare väöl feesjes geboewd. En wat sjiek is, d'r kump weer ‘n gans nuuj Uulegezeljsjap bie; ‘**t Gajus!** De Uulejónges van ‘t eerste oer waere lanksaam get te groot veur de Uulejónges en hóbbe zelf de mach gegrepe. Es Vórs waerde veer gans gek gemaak om häör de tillefoon- en mailgegaeves van oze Penningmeester Dimfy te gaeve. Daonao hóbbe ze eigeheanjig ‘n nuuj versie van de vereinigingsbegroting gemaak die persé op de Algemeine Leje Vergadering (ALV) in sjtumming móude waere gebrach. Rizzeltaat; nemes op de ALV durfde taege de begrotingsversie van ‘**t Gajus** (inklusief € 1.111,11 veur häörzelf) te sjtumme. Volgend jaor in oos jabeleijemjaor 8x11 wille zie ‘n eige Vastelaovesfees veur jeug organisere, auch dao durfde nemes meer taege te zeen. Veer zeen benuijd wat veer van die jonge allemaol te zeen kriege, es det mer allemaol good geit..... De Kienjermusical kint auch weer trök nao häör vertroewde Appelsienerie want dirrektaör Rob Polman haet ‘r mit alle mitwirkers en

aannaemersbedieve veur gezorg det de Oranjerie-verboewing op tied gans aafgerónjd is. Netuurlijk zeen veer auch gans dankbaar nao alle mitwirkers aan deze sjieke 18e Uulewapper. Bie ‘11.111’ jeugdige op de deurmáit óm de Vastelaovend te bringe. Merci aan ‘de hendjes’ van scouting St. Hubertus veur ‘t róndjbringe. Sjpesjale dank aan Luuk Hendriks en Marjo Peeters, zie hóbbe ekstra beinkes veuroet gezat óm dit alles meugelik te make, chapeau! Vergaet auch ‘t Sjnapsnazebal neet. Gans veur de kienjer op 10, 11 en 12 fibberwarie in ‘t Witte Kirkske, de papa’s en mama’s moge auch mitkómme.

Nog eine keer kieke veer trök en zègke veer dank aan ‘t Jeugprinselik Gezelsjap 2023. Greuts en mit väöl enerjzie ging **Jimi I van Rey** mit adjudante **Tijl en Sam**, D'n Uul en alle Remunjse kienjer en jeug veur. Grote chapeau, dao naeme veer nog eine keer sjpraekwaardelik de móts veur aaf! Veer zeen es Vórs blie det veer noe weer gans kópleteet zeen óm same mit de twee Prinselike Gezelsjappe en oos ganse Oettrékkend Gezelsjap en de ganse Uulefamilie kinne viere. Mit oos **Hooghede Dean I** en **Joep I** same mit häör adjudante es middelpuntj, zólle de Damesgarde, Prinseképel en Raod van XI zeker gaer mit de Kienjergarde, Jeuggarde en Uulejónges op paad gaon. Det waert waal ‘n bietje puzele want veer hóbbe jaomer genóg ‘n heel kort Vastelaovendsezoen. De wieze Senaat zal d'r bie zeen es zie kinne óm feesjes mit de kienjer en jeug te viere. Laot uoh es Uulekienjer in eder geval euveral heure en zeen óm duchtig te feeste! Nog belangrieker; doot det neet allein mer naem auch vrunj en/of vrundinne mit, want wie meer kienjer, wie baeter en groter ‘t feesje!

Väöl Vastelaovespleezer gewins mer vergaet neet; Vastelaovend viert ederein op zien eige wies... mer waal SAME!

*Vórs-veurzitter  
Dirk I Franssen*



# BREAKING NEWS

## NUUJ HOOFSTÖK VEUR DE UULEJÓNGES AANGEBAOKE!

't Jaor 2023 zal de gesjiedenisbeuk ingaon es 't lèste jaor van de Uulejónges, veurdet zie in 2024 weer zólle herrieze! Oproop aan alle jeug van Remunj: haaj uch vas, zit uch sjrap, want d'r is 'n waore revolutie op kóms!

Nao jaorelank 't Vastelaoveslandsjap van Groot Remunj en ómsjtreke veur altied te höbbe verangerd, hadde de Jónges aangegeave det 2023 häör aafsied zól waere. Nog eine keer knalle zodet ederein nog eine keer van häöre aanwezigheid, perseunlikheid, jongesheid, muzikaliteit en van häör dansmoves kós genete. En wat veur 'n jaor is 't gewaore, want bie 't oetroepe van de Sjtadsjeugprins sjtóng oze Tijl ouch op 't podium in de sjooste rol die 'ne echte VastelaovesJóng zich mer kin winse, dae van Adjudant! Eine droum dae oet kump...

Alle ingrediënte wore daomit aanwezig óm mit 'ne grote knal aafsied te naeme van de Uulejónges en det is den ouch gebeurd! Euveral wo zie kwome waerde zie mit gejuich óntvange en wore d'r óntroerende taferele; d'r wore emotionele präötjes, dankbetuginge en miense sjmekke häör óm neet te sjtoppe. Massahysterie is links en rechts ouch veurgekómme; de maatsjappie wis neet wie ze mit deze break-up om móos gaon. Nao The Beatles, Take That en One Direction ouch nog de Uulejónges.

Ederein probeerde de Uulejónges mit grootse beloftes en toezékgkinge in te lieve: Timmie Tirol, De Katers, De

Busjop, De Sjpeglent en zelfs de Sjonnies höbbe häör zjwaorgewich ingezat!

Mer ... de Jónges höbbe anger planne ... sjnode planne ... duustere planne ...

Zie zólle bie-ein blieve en zólle veur altied bekind blieve es de aaj Uulejónges, mer det is neet alles. Zie zólle gaon oetbreije en de Vastelaovend veur de jeug in Remunj gaon euvernaeme. Haaj uch vas, want vanaaf noe zal de Remunjse jeugvastelaovend nooit meer 'tzelfde zeen...

In 2024 zal 't nog óm sjpóntane, kleine aksies gaon mer vanaaf 2025 moog Remunj zich gaon veurbereije, want G.A.J.U.S. kump d'r aan!

*Waert vervolg...*



**BREAKING  
NEWS** G.A.J.U.S. KUMP D'RAAN!

NUUJ HOOFSTÖK VEUR DE UULEJÓNGES AANGEBAOKE!



# De gesjiedenis van 't Sjnapsnazebal

Ich weit waal bienao zeker det geer allemaol waal ins nao 't Sjnapsnazebal zeet gewaes. **Op vastelaoveszaoterdag, -zóndaag en maondaag geit in 't Witte Kirkske van 15:00 oer toet 19:00 oer 't daak d'r aaf.** Alle kienjer toet en mit 12 jaor kinne zich den ammezere mit sjpelkes, sjlók en meziek. Mer wie is det Sjnapsnazebal eigelik ooit begós?

Waal bienao 6x11 jaor geleje waerde op de Zzwamersjtraot (naeve de Mert) veur 't eers ein Sjnapsnazebal georganiseerd. Alleen had 't toen waal 'ne angere naam: De Snoternaze. Op vastelaoveszaoterdag hadde zie dao hääör feesje. Twee jaor later waerde de naam verangerd in Snapsnaze. D'r waerde ouch 'ne eige prins oetgerope. Al flót waerde 't ivvenement drök bezóch en doerde 't mer leefs drie daag. Daodoor mósde de organisasie döks op zeuk nao 'n anger lokasie. Zo höbbe ze 't ónger angere in 'n aaj autograasj gehaje. Dao mós op ein gegaeve moment ein ekstra tent waere opgezat, ómdet d'r angers gein ruumte meer waas veur alle kienjer.

Vieja 't Karthoes en 'n danssjool kwoom de organisasie begin jaore '90 terech bie meneer Arend Nollen op de Sjtäägsjtraot. Mesjens höbbe dien elders dao nog 't Sjnapsnazebal gevierd. Vanaaf det moment is D'n Uul d'r ouch bie betrókke. Op eder lokasie haet de organisasie

altied alles zelf geregeld: van versiering toet leech en geluid. Eder jaor waas 't Sjnapsnazebal ein sjoon vastelaovesfees veur jónk én aad! Nao 11 jaor vónj meneer Nollen 't waal good gewaes, mer gans sjtoppe mit 't Sjnapsnazebal waas netuurlik gein meugelikheid. Dus móos d'r weer ein nuuj lokasie geregeld waare.

Det is in 't jaor 2008. Aad Uuleprins Jos (III) Stoks waas toen veurzitter van 't Witte Kirkske en dae haet toen geregeld det 't Sjnapsnazebal in 't Witte Kirkse plaats kós vinje. Vanaaf det jaor is op vastelaoveszaoterdag, -zóndaag, -maondaag en soms ouch op dinsdaag heel get loos in de Veursjstad. Es se binnekumps sjtruikel se haos euver de kienjerwages, zo drök is 't dao. Aan de bar sjtaon de elders lekker ein pilske te drinke, terwiel zie mit 'n sjuuns oug hääör kienjer in de gate haje. Die renne zich van entoesjasme bienao ómver op 't podium toetdet ze d'r meug aan zeen.

En noe viere veer 't Sjnapsnazebal nog altied in 't Witte Kirkske. Al veur 't 16e jaor kinne alle Ulekienjer zich kómmende vastelaovend ammezere mit sjpelkes, sjlók, kleurplate en meziek. En jao, veer zólle d'r kómmend jaor ech op lètte det de meziek neet te hèl sjteit.

Mit dank aan Aad Uuleprins en Sjnapsnazevriewilliger Hans (I) Geurts



D'N UUL PRIZZENTEERT



10, 11 EN 12  
FIBBERWARIE 2024



# SJNAPS-NAZEBAL

- 15.00 - 19.00 OER
- WITTE KIRKSKE IN DE VEURSJAD
- GRATIS ANTREE
- THEMA: RIO AAN DE ROER





# 'n Interview mit Big Benny! ICH ZÈGK: GAAS!

**OP 'NE DUUSTERE DINSDAAGAVOND MAKE VEER KINNES MIT DE MEIS POPULAIRE ZINGER VAN REMUNJ, BIG BENNY. ØZE JUNIORREPORTER JIMI I (ALLES PALETTI? CONFETTI!) VEULT DE REMUNJSE ZJIWAORGEWICH 'NS DUCHTIG AAN DE TANDJ.**

**WIE ZEET GEER EIGELIK OP 'T IDEE GERÉMMÉ ÓM TE GAON ZINGE?**

Ein gooq vraog jong. Ich höb dae druim eigelik nooit gehad, want ich woor komiek. Ich mós 'ne keer get prizzentere in Gelaen veur miene ex-sjoonpap en toen zei dae: " 't Is leuk es se tössedoar mesjens get leedjes zings." Óm 'n lank verhaol kórt te make, ich höb toen twee leedjes gemaak, Takke takke dai da (euver de Romeine) en Sjat van mich en dao veur 't eers gezonge.

**WAAT VINDJ GEER 'T LEUKSTE LEEDJE DAT GEER OOIT HÖÖD GEMAAKT?**

Det is Lach nog ens! Det geit d'r euver det se dien ganse laeve móos lache, waat d'r ouch gebeurt. Es se in 'n dipje zits, móos se dich realisere det de zon waal weer geit sjiene en det se móos blieve lache.

**WAAT VINDJ GEER 'T VËSTSTE IUVENEMENT ÓM OP TE TRAEJE?**

Miene aovend in Rotterdam Ahoy woor netuurlik waal heel gaaf, mer de Sjtasiefestasie en Sjolefestasie sjtaon baouveaan. Ómdet 't zo groot is, mer veural omdet 't ne toeswedsjried is. Det pebliek haet mich groot gemaak!

**WO KIEK GEER 'T MEIS NAO OET DEZE VASTELAOEVEND?**

Wil se 'n eerlik antwoord? Jao? De dinsdag! Den weit ich det alles good gegange is, det alle optraejes good ging en det de miense tevreje zeen. 't Is zo drôk en doe wils ederein 'n gooq show gaeve. Es det gelök is gaon ich dinsdaagaovend zelf op sjtap. Den eindig ich bie de Veldjmuus, dao laot ich mich lekker volloupe. Mmm.

**WO GAOT GEER 'T LEIFS OET AETE?**

Bie de Griek in Neel, 100 maeter van mien hoes aaf. Den besjèl ich mich 'ne vleissjöttel. Lekker doon bie, kin mich 'n pilske drinke en hoof ich neet te rieje.

**EN TIEDES DE VASTELAOEVEND?**

Bienao allemaol sjnelle hap, omdat veer bienao geine tied höbbe. Mer ich höb waal ein dink waat ich ech altied lekker vinj: balkebrie, ja, det vinj ich zóóó lekker.

**KINT GEER 'T WERK IN DE PÖLLETIEK GOOD RÖMBINERE MIT 'T WERK ES ZINGER?**

Jao, pöllietiek is euverdaag, optraeje is 's aoves. Soms sjitelle miense mich 'n vraog euver de pöllietiek es ich aan 't optraeje bön, mer die parkeer ich. Den zègk ich: "Morgevreug bös doe de eerste."

**WAEM IS EURE FAVORIETE ZINGER?**

Frans Theunisz, dao höb ich enorm vaol resjpek veur. Hae is net wie ich geine echte zenger, mer 'ne entertainer. Dae miens is 78 jaor, mer es se den zuus det dae nog teen optraejes per wiekend duit, neet normaal. Es dae de microfoon pak... (Benny zink 'n stjök van Griekeland van Frans)

**VINDJ GEER 'T RUIG DET D'R VAOL JÉNGE ARTIESTE BIÉKOMMÉ OET IS DET CONCURRENTIE?**

Jazeker, sjtèl dich veur det die neet kómme. Ich sjnap de vraog, mer 't is heel belangriek. Sjpringlaevend, Marleen Rutte, Danny Pouwels, det saort artieste mótt 't euver gaon naeme!

**ZIT DE AGENDA AL GOOD VOL?**

Ram! Ich bön noe al bezig veur 2026. Veur 2025 zeen d'r ouch nog get plekskes, mer 't meiste zit vol. Mit 't gevolg det ich beveurbeeld in 2025 neet bie de Sjtatifestasie bön, ómdet emes angers mich eerder haet gebook. Det is waal jaomer netuurlik.

**EN WIE ÓNTSJPANT GEER NAO 'N OPTRAEJE?**

Nou, eigelik door te kalle mit de luuj. Det maak mich röstig. Es 't leuk is gewaes en de miense höbbe zich geammeeerd, zorg det veur óntsjspanning bie mich.

**WIE ZIT 'T MIT DIE BLOËZE IN ALLEMAOL VERSJELLENDE KLEURE?**

Miene bloes? Toen ich begós waog ich 168 kilo. Es ich dan vroog óm

allemaol de henj in de lóch te doon, dee ich mit, mer sjting ich in de blote boek. Toen zag mien ex-vrouw: "Veer make dich eine lange bloes", en det is eigelik altied zo gebleve. Ich höb d'r 26 zoget. Aad Sjtadsprins Vito I Campos haet troewes ooij een bloes van mich gekrige.

**ES GEER 'NE SJNACK OET DE FRITUUR ZÓËL ZEEN, WELKE SJNACK ZÓËL DET DEN ZEEN?**

Det lik d'r aan bie welke frituur ich bön. Es ich bie de sjnackbar inne sjtad zou zeen, zou ich 'n bamiblöks wille zeen. Of angers ein frikkedel spesjaal.

**HÖÖD GEER NEG EIN NUUJ LEEDJE OPGENAOME?**

Ja jao, Sjæle wiekser! Ich höb 't neet taege dich hè? Zo hèt 't nummer. 't Is éch 'n Big Benny nummer, veer regels teks en gaas!

**HÖÖD GEER NEG GET BE ZÈGKE TÆGE DE LÆZERS VAN DE VULEWAPPER?**

Blief vastelaovend vere op eur meneer!

**EXTRA: TOP 3 FAVORIETE REMUNJSE WÄÖRD VAN BIG BENNY**

Venne (bötteramme)  
Sjöttelsplak (vaatdook)  
Sjräöm (geldj)



Jimi mit Big Benny



# \*Kienjergarde 2024\*



Kienjergarde van links nao rechts: Julie Houben, Fien Tobben, Sanne Vervoort, Saar Puts, Madeleine Geenen, Mila Tobben, Valerie van Rey, Frederike Linssen, Liss Aben, Emma Hendriks, Anna Wijnands, Lot Puts, Liv van Dooren

## WIS SE DƏR:

- 1 De Kienjergarde altied 'n leuke aktiviteit organizeert in de zomer?
- 2 De elders den ouch lekker mit moge barbecueën?
- 3 De Kienjergarde vanaaf 't begin van 't sjooljaar op zaoterdaag traint?
- 4 Es 't denske klaor is, de maedjes den gaon aete mit de trainsters?
- 5 Sinterklaos ouch altied 'n bezeukse aan de trainingen brink?
- 6 Veer dit jaor mit 13 maedjes danse?
- 7 Veer in de optoch op de wage moge sjtaon?
- 8 Veer 'n wachlies höbbe?
- 9 Doe dichzelf kins aanmelje vieja kienjergarde@gmail.com?
- 10 De maedjes altied gooij zin höbbe?
- 11 Veer allemaol vastelaovesgekke zeen?

## VERHÅÖLKE EUWER DE KIENJERGARDE

De Kienjergarde haet 't aafgeloupe jaor 'n fantasties leuk sezoen gehad same met Jimi I en zien adjudante. Veer höbbe väöl resepcies bezöch en de Prinsewins van Jimi woer lekker vies, vëttig en frikkedellerig. Nao de kirmes mit Ome Sieb woer heel dreijerig. Ome Sieb haet d'r veur gezorg det veer euveral in móchte. Ouch de optoch woer super leuk. Op de wage woer 't ouch nog aeve sjpannend. Kósde we de bóch waal naeme?

Nao 't sezoen höbbe de maedjes 'n leuke sjpeurtoch gedaan óm 't sjone Remunj te óntdekke. Daonao höbbe veer genaote van 'ne lekkere BBQ wo de elders gezellig zeen aangesjlaote. Ein aantal papa's haet d'r veur gezorg det 't vleis neet kós aanbranje.

Nao de zomerfekansie zeen veer gesjart mit de training veur 't denske van 't nuje sezoen en deze dans is weer sjitterend. De trainsters höbbe de maedjes oetgeneudig veur 'n aetentje bie Le Journal. Dao höbbe ze lekker gesjmikkeld van frietjes mit 'ne snack en es toetje 'ne heerlike cake. Dit jaor is Sinterklaos ouch weer op bezoek gewaes en dao höbbe de maedjes get lekkers van gekrege.

Liek 't dich leuk óm dit alles same mit anger maedjes oet Remunj mit te make en bös se bie 't oetrope van de Jeugprins 6 jaor? Gaef dich den op! Den zólle veer dich op oos wachlies zitte. Aanmelje kin vieja kienjergarde@gmail.com

Groetjes van de leijing, Marijn en Renée

*Halou allemaol, ich bön Emma, vlak veur de 'Middaag van de nuje Sjádsjeugprins' waer ich 7 jaor. Mien hobbies zeen handjalle, danse bie de Kienjergarde en zwumme. Knutsele en teikene doon ich ouch gaer. Danse mit de maedjes van de Kienjergarde vinj ich super sjiek. Groetjes Emma*



Emma Hendriks





D'N UUL  
PRIZZENTEERT

# RIO AAN DE ROER

KIENJERMUSICAL 2024

4 fibberwarie 2024  
Theaterzaal De Oranjerie

Veursjtellinge: 13.00 oer en 16.00 oer.

Kaarte te koup bie De Oranjerie

Teks, verhaol: Frits Criens i.s.m. kemissie kienjermusical

Ontwerp: Freek van Empel

# KIENJERMUSICAL 2024

ZO'N 60 KIENJER OET REMUNJ VAN 6 TOET 16 JAOR DOON DIT SEZOEN WEER MIT AAN DE KIENJERMUSICAL. 'N PRODUKSIE VAN SJTADSVASTELAOVESVERENIGING D'N UUL. DE KIENJERMUSICAL IS 'N VEURSJÈLLING VEUR EN DOOR KIENJER MIT TONEEL, ZANK EN DANS. NAO DE CORONAJAORE EN DE VERBOEWING, DIT JAOR GELÖKKIG WEER OP 'T GROTE EN NUJE TONEEL VAN THEATERHOTEL DE ORANJERIE.

## 'T VERHAOL

't Is 'n groot fees op de zolder van Fleur. Morge höbbe de maedjes sjoolvastelaovend en daonao gaon ze veur 't eers allein nao de Sjolefestasie op 't Sjtasieplein. Helemaal te gek netuurlik det alle vrunj bie Fleur in de sjtad kinne blieve sjlaope op dae aje zolder. Ze verheuge zich enorm op de Sjolefestasie en óm alvas in de sjtumming te kómme, downloade ze de Vastelaoves Challenge App. Doe mós elf challenges doon en dan kins se 'n gratis show winne van diene favoriete Vastelaovesarties.

Vol entoejasme waert d'r mit de eerste challenges gesjart. Mer dan gebeurt d'r get wo door de maedjes obbins in 't Carnaval van Rio terech kómme in plaats van in Remunj. Wie móet det noe? Kómme ze toch nog op tied trök in Remunj veur de Sjolefestasie? Es det mer allemaal good kump...

## DATUM, TIED EN KAARTVERKOUP

De veursjtelling is veur de ganse famielie. Opa's, oma's, ederein is van herte waalgómmé! Op 4 fibberwarie zeen d'r twee veursjtellinge in Theaterhotel de Oranjerie in Remunj. De eerste veursjtelling begint óm 13:00 oer. De tweede veursjtelling is óm 16:00 oer. Nao de veursjtelling is d'r nog tied veur 'ne gezellige naozit wo ederein ónger 't genot van 'n drenkske nog lekker kin naogenete. Kaartjes koste € 11,- per sjtök veur leje van D'n Uul en € 12,50 veur neet-leje. Ze zeen te koup bie de resepsie van Theaterhotel de Oranjerie in Remunj.



# DE KIENJER VAN DE KIENJERMUSICAL HAJE VAN VASTELAOVEND!

Ontwerp: Freek van Empel



22

## HIEJ ZEEN ZE: DE HOOFROLSPELERS VAN DE KIENJERMUSICAL 2024



### JONIE VAN DER GOOR 14 JAOR

Hallou! Ich bön Jonie en ich sjeepel de rol van Djamiliana. Djamiliana is sjtapelgek op Rodrigo, ouch waal Rodri geneump. Naodet 't mit zien vrundinne nao Rio de Janeiro geteleporteerd is en Rodrigo taegekump, dink 't nörges angers meer aan. Häör vrundinne Fleur, Tess, Haily en Anne-Sophie waere d'r gek van. Zie vinje mer det Djamiliana euverdrief... 't Belaof ein sjetterende, supergave veursjtelling te waere!



### ESKIL VAN DER HEIJDE 11 JAOR

Hallou! Ich bön Eskil en ich sjeepel de rol van Rodrigo. Rodrigo haet 't altied euver chiquita's. Mien elders mótte dao erg óm lache, zie dinke den geliek aan banane. Ich noe dus ouch. Djamiliana sjtaart sjteeds nao mich, ómdet 't verleef op mich is... De leedjes van dit jaor zeen erg swingend en medein mit te zinge. Det is erg leuk veur de sjfeer!



### ISA BELGERS 12 JAOR

Hallou! Ich bön Isa en ich sjeepel Maria. Maria verangert van erm sjtraotretje toet de vastelaovesqueen van Brazilië! En det in sjlechs in eine daag! Wie cool is det! Eigelik móss se euveral op lètte tieedes de veurstelling, det maak deze Kienjermusical super leuk!



### ZUMI BEEREN 8 JAOR

Hallou! Ich bön Zumi en ich spjeel 't rieke maedje in de Kienjermusical. Ich moog es riek maedje blikskes oppe grondj goje en 't leefs ein bietje euverdreve. Daobie mótt ich den taege anger kienjer zègk: "Waat 'n zjwervers!" Ich doon dus 'n bietje oet de heugte en daoróm bön ich ouch deftig gekleijd. 't Koor zink bekinde leedjes wo spesjaal veur de veursjtelling 'ne nuje teks op is gemaak. Die tekste vin ich heel grappig. Ich hub ouch nuje sjtraottaal geleerd. 'Miene pokkie' bieveurbeeld, det is miene tillefoon.

23

# Kaoke mit Uulke

## Vastelaovesresepte

### Truijessoep



Dees lekker dieke soep mit tomate, gehak en roukwórs is de ultieme baom óm diene boek good te vulle veurdet se mit de vastelaovend op sjtap geis. Kleine waarsjuwing: bie dit resep höbs se waal 'n sjerp mets neudig, dus 't is aan te raoje óm den aeve de hulp van pap of mam in te sjakele. De soep is veur ach persone, dus ederein moog aansjuwe! 't Lekkerste is óm de soep al eine daag van te veure te make, zodet alle sjmake good in kinne trèkke

#### Waat höbs se neudig:

500 gram gemyngd gehak / 2 oje / 3 tene knoeflouk / 1 rooij, 1 gael en 1 greune paprika / 2 pore (prei) / 680 gram witte bone in tomatesaus / 1 roukwórs / 4 runderbuillonblökskes / 1 aetlaepeel basterdsókker (broene sókker) / 1 theelaepeel sambal oelek / 2 liter water / 1 liter tomatesap

#### Wie maak se 't:

- SJTAP 1 Pel en hak de knoeflouk fijn
- SJTAP 2 Pel en sjnipper de oje
- SJTAP 3 Sjnie de paprika in reepkes of blökskes
- SJTAP 4 Sjnie de pore in rinkskes
- SJTAP 5 Sjnie de roukwórs in plekskes
- SJTAP 6 Bak 't gehak rul in een grote braodpan
- SJTAP 7 Doot de oje, knoeflouk, paprika en poor d'r bie en bak det 'n paar minute mit
- SJTAP 8 Doot vervolges de bouillon, tomatesap en de witte bone in tomatesaus d'r bie en reur det good door elkaar
- SJTAP 9 Doot de basterdsókker en sambal d'r bie. Blief óngertösse waal good reure.
- SJTAP 10 Laoft de soep op leeg vuur pruttele en doot d'r get water bie es de soep te diek is
- SJTAP 11 Doot noe de roukwórs d'r bie en laoft de soep nog zo'n 3x11 minute op leeg vuur zaach pruttele

### Limburgs zoervleis

Höbs se nao dae ganse kaetel soep nog sjteeds hónger? Den kins se noe aan de sjlaag mit 'n ech Limburgs gerech det mit de vastelaovend väöl gegaete waert: zoervleis. Ouch bie dit resep is 't sjlum óm dich door mam en/of pap te laote helpe.



#### Waat höbs se neudig:

Ingrediënte: 1 kilo runderriblap, in middelgrote sjtökke gesjneje / 200 milliliter netuurazien / 2 oje, gepeld en in halve ringe gesjneje / 3 kruidnaegel / 3 laurierblajer / vloeibare bakbóttter / 3 aetlaepeels appel-paerekruutje (stroop) / 1 of 2 aetlaepeels broene basterdsókker / 2 plakte óntbijtkook / paeper en zaat

#### Wie maak se 't:

- SJTAP 1 Doot 't vleis in 'n grote kómp same mit de azien, kruidnaegel en laurierblajer en vul aan mit water toetdet 't vleis nét ónger water sjteit. Dék aaf mit vershaadfolie en zit de kómp in de ieskas. Laoft 't minimaal 4 toet maximaal 24 oer marinere.
- SJTAP 2 Laot, naodet se 't vleis gemarineerd höbs, 't vleis oetlekke en vang 't vóch op. Dep 't vleis dreug mit get keukepepiér.
- SJTAP 3 Zit de braodpan op 't fernuus, kniep d'r flink get vloeibare bakbóttter in en laot 't good heit waere. Doot den veurzichtig 't vleis d'r bie. Neet te väöl in eine keer. Besjtruij 't vleis mit paeper en zaat en bak 't kórt aan zodet 't vleis kleur krieg. Sjöp 't den oet de pan.
- SJTAP 4 Doot es 't neudig is get extra bótter in de pan en bak in 't vét van 't vleis de oje toetdet ze zaach zeen. Doot 't vleis bie de oje en blus aaf mit 't marineervóch waat se in sjtap 2 höbs opgevange. 't Vleis hoof nét neet gans ónger te sjtaon. Es se te weinig vóch höbs, kins se d'r get water bie doon.
- SJTAP 5 Bring alles aan de kaoke en doot den de kruutje, sókker en óntbijtkook d'r bie. Lét op det se neet te väöl sókker gebroeks, want den waert 't te zeut. Reur alles good doorein en doot de dékkel op de pan.
- SJTAP 6 Sjtuof op't leegste vuur in óngeveer 3 oer, of toetdet 't vleis zaach is en mekkelik oeterein velt es se d'r mit 'n versjet op duujs. Es se 'n sudderplaatje höbs, kins se det geboeke. Det zorg d'r namelik veur det 't vóch neet geit kaoke.

Laoft 't sjmake!





# VASTELAOVESARTIES DANNY POUWELS

## EUVER LEDERHOSEN, SUSHI EN DE SJOLEFESTASIE

WAAT? DANNY POUWELS? WAEM IS DET? NOU, DET ZÓLLE VEER UCH 'NS VERTÈLLE. DEZE 3XII-JÄÖRIGE ZENGER OET KIRCHROA (KERKRADE) IS DE MEIS GEBOOKTE VASTELAOVESARTIES! AANKÖMMEND VASTELAOVESSEZOEN SJTEIT DANNY VEUR DE 3E KEER OP DE SJOLEFESTASIE, DUS HOOG TIED ÓM DEZE KAEREL 'NS DUCHTIG AAN DE TANDJ TE VEULE! VRAOGEVUUR!

### IS VASTELAOVEND NOE ROED, GAEL OF GREUN?

Den toch rood, dit kump 't meis in de buurt van Kórmis. Det is mien favoriete sezoen, nao de vastelaovend netuurlik!

### KLEINE ZAAL OF GROTE BUUN?

Heel eerlijk? 't Leefs 'ne kleine zaal, want den sjeis se dich bie de luuj en den is 't ouch tastbaar. En d'r is veur mich nieks sjoners es doon bie de luuj zeen en 'n präötje make mit ederein. Allein lök det door miene drökke agenda neet altied, det vinj ich soms waal jaomer!

### HARDSTYLE OF HOEMPAPA?

Deze is ech waal lèstig heur, haha! Ich haaj d'r van es meziek heel sjtrak geproduceerd is, en det is bie hardstyle. Mer ich haaj ouch van de sjfeer in hoempapameziek. Van alles 'n bietje, eigelik.

### FRIET SPESJAAL OF SUSHI?

Sushi netuurlik, kóm op! Waem wilt noe gein lekker sjtoske zalm? Es geer dit interview hüb gelaeze maak ich 'ne poll aan op mien Instagram (@danny.pouwels) en den gaon veer sjtumme!

### GTA OF 'N BORDSJPEL?

Vreuger sowieso GTA. Mer noe böñ ich obbins van de bordsjpelle. Ich höb 'ne PlayStation mit alles d'r op en d'r aan mer ich gebroek 'm neet... Zal waal door de drökke planning kómme, haha.

### SNOWBOARD OF SJOLEFESTASIE?

Veur 100.000% de Sjolefestasie! Ich sjtaon dao noe veur de 3e keer mer man, waat is det gaaf! Kós ich uch mer laote zeen waat ich zeen vanaaf de buun! Det geveul is ech ónbesjriefelik! Daoróm is det ouch 't optraeje wo ich 't meis zin in höb. Eigelik vinj ich det emes ech 'n leedje mit mich mit moog doon oppe Sjolefestasie. Mer den waal de gròtste vastelaovesvierder van Remunj! Sjtuur mich mer 'n berichje es doe mit mich 'n leedje wils zinge.

### DOE BÖS DE MEIS GEBOOKTE ARTIES.

### WIE DÖK MÓS SE OPTRAEJE DIT VASTELAOVESSEZOEN?

Miene agenda zit ech knatsjvol. Veer perbere hie en dao nog kleine gaetjes te völle mer det is bienao neet meer meugelik. En det is ouch waat ich bedoel mit det ich neet altied

tied höb veur 'n präötje. Soms höbbe veer letterlik nul minute sjiping, dus es veer den örges in de file belanje höbbe veer ech waal 'n perbleem!

### WAAT IS DE GEKSTE OF SJIKESTE PLAATS WO SE OOJT HÖBS OPGETRAEJE?

Det is dink ich veur 17.000 man op de 11devande11de in Remunj. Waanzinnig det ze det veur elkaar kriege!

### DOE HÖBS 'NE HEEL NUJE VASTELAOVESSOUND. ZÖLS SE DAE KINNE ÓMSJRIEVE?

Uhm... Dannypower, hahaha! Mien veurdeil is det ich veur versjillende artieste meziek maak en ouch van versjillende artieste meziek krieg. En dao plök ich de vruchte van. Daobie help ich heel gaer mien kelegaartieste en beginnende muzikante op waeg. Ich höb namelik alles zelf mótte doon en noojt hulp gehad. In de loup van de jaore is mich heel väöl dudelik gewaore en deze kinnes deliçieel ich heel gaer mit ederein dae ouch wil beginne.

### IN ZIEN INTERVIEW IN DE UULEWAPPER NUMP BIG BENNY DICH DE NUUJ GENERASIE. WIE KIEKS DICH TAEGE HEM AAN?

Laot mich eers zègke det ich heel väöl resjepk höb veur Ben! Ich böñ hem heel dankbaar en det wèt hae ouch. Veer höbbe väöl ketak zo door 't jaor haer. Ich zeen 'm döks optraeje en det nump hae heel serejeus. Netuurlik kin 'n zaal op de kop gezat waere mer Big Benny brik

euveral de tent aaf! En ouch al is hae neet meer zo jónk wie ich, mer wieväöl enerzjie dae nog haet ... ich moog allein mer haope det ich euver 2x11 jaor ouch nog zo kin optraeje wie hae duit! Ech allein mer lof veur Ben! Neet allein es arties, mer ouch es persoon. En det mein ich ech!!

### WAAT HÖBS SE MIT REMUNJ?

Dao kin ich heel kórt euver zeen en ouch dit mein ich ech! Ich woon in Kerkrade en 't enige det ich taege de luuj daa zègk is: gank 'ns nao Remunj! Waat se dao zuus, zuus se nörjes. Remunj is geweun in alles next level. Dit vinj ich ech 't veurbeld van wie se vastelaovend viers!

### ES SE 'N KLEIJERSJTÖK ZÖLS ZEEN, WAAT ZÖL DET DEN ZEEN EN WORÓM?

Sowieso 'n kórté bóks want die draag ich altied! Werm of kaad, waer of gein waer. Altied de lederhosen.

### WILS SE NOG GET ZÈGKE TAEGE DE LAEZERS VAN DE UULEWAPPER?

Ich böñ d'r van euvertuug det es se get wils bereike in 't laeve en doe höbs 'n realisties doel gesjteld, den is ech alles haolbaar! Dit vergt doorzettungsvermoge mer es se alles durfs op te gaeve óm diene druim te laote oetkómmre den lök dich det. Mer vergaet nooit wo se vandaan kumps. Dees luuj zeen 't belangrikst veur dich! Mit de juuste miense en sjteun is alles meugelik!



# >> VEURSJTEËLLE JEUGGARDE 2024

## DE MAEDJES VAN DE JEUGGARDE ZEEN WEER GANS KÖMPLÉET. OP DEES PAGINA'S LEERT GEER ZE GET BAETER KINNE.

Hallo! Ich bön **SANNE BOVENS** en ich bön 13 jaor. Ich zit op hokkie en danse. Ich bön dit jaor nuuj bie de Jeuggarde. Ich zit op Yuverta.

Hallo! Ich bön **TIRZA CRIENS** en ich bön 12 jaor. Ich zit op voltige (det is acrobatiek op 'n paerd) en paerdrieje. Ich bön dit jaor bie de Jeuggarde gekómme en daouveur dánste ich al vanaaf mien 7e bie de Kienjergarde. Ich zit op Busjoppelik Kelezje Broekhin. Ich vinj 't altied super gezellig en leuk óm mit de groep te traine en te danse en ich haop det 't ein heel leuk sezoen geit waere!

Hallo! Ich bön **ZOË KESSELS** en ich bön 13 jaor. Dit is mien tweede jaor in de Jeuggarde. Ich zit op 't ROER Kelezje Schöndeln. Ich haop det veer een superleuk jaor gaon kriege.

Hallo! Ich bön **ELISA PRESTIGIACOMO** en ich bön 15 jaor. Mien hobbies zeen hokkie en danse. Ich zit al 4 jaor in de Jeuggarde. Ich zit op Yuverta. 't Leukste aan de garde vinj ich de gezelligheid mit de maedjes. Ich vinj de vastelaovend altied super leuk!

Hallo! Ich bön **BIBI BROUNS** en ich bön 14 jaor. Ich voetbal gaer en gaon döks nao boete mit vrunj. Ich zit op 't ROER Kelezje Schöndeln. Dit is mien derde jaor in de Jeuggarde. Ich vinj 't altied leuk es veer d'r op oet gaon mit de garde.

Hallo! Ich bön **VIENNA PRESTIGIACOMO** en ich bön 15 jaor. Ich vinj 't leuk óm te voetballe. Dit is mien veerde jaor bie de Jeuggarde. Ich zit op Yuverta. 't Leuke aan de garde vinj ich oetgaon mit de groep en de gezellige sfeer.

Hallo! Ich bön **MARIT NELISSEN** en ich bön 14 jaor. Mijn hobbies zeen ponnerieje en danse bie de Jeuggarde! Det doon ich noe veur 't veerde jaor. Ich zit op 't Connect Kelezje in Ech. Waat ich 't allerleukste vinj aan de Jeuggarde is 't d'r op oet gaon en 't feeste mit alle maedjes.

Hallo! Ich bön **SARA VAN ETEN** en ich bön 14 jaor. Mien hobbie is danse bie The Movement. Ich bön op mien 7e begós bie de Kienjergarde en dit is mien derde jaor bie de Jeuggarde. Ich zit op de Vrije Sjool Broekhin.

Hallo! Ich bön **JULES TANKERSLEY** en ich bön 15 jaor. Dit is mien tweede jaor bie de Jeuggarde. Ich zit net wie Sara op de Vrije Sjool Broekhin. Ich vinj de sfeer van vastelaovend heel leuk, en ich vinj 't altied heel gezellig same mit de maedjes.

## !OPROOP: NUUJ MAEDJES VEUR DE JEUGGARDE GEZÓCH!

Eder jaor in september beginne veer mit traine. Veer traine edere zaotterdaagaovend van september toet begin jannewarie. De eerste training is nog röstig aan beginne, mer al flót waert d'r alweer hél geoefend.

Veer zeen op zeuk nao maedjes van 12 toet en mit 15 jaor die 't netuurlik leuk vinje óm te danse én van vastelaovend haje.

Eder training is super gezellig en veer höbbe altied 'ne super leuke dans Gardedans is wael get angers es "geweun" danse, 't is intensief mer waal heel leuk.

Es de jeugprins in jannewarie is oetgerope, begint 't sezoen pas ech. Dan gaon veer mit de ganse groep gezellig nao resepsies van anger vereniginge, wo veer den lekker moge danse.

Meistal gaon veer den mit 't ganse Uulegezelsjap mit de bös. Die bösreisjes zeen supergezellig, lekker mit zien alle vastelaovesleedjes zinge!

Es de vastelaovend éch begint, kómme de leukste aktiviteite d'r aan. Waat veer zelf 't allerleukste van alles vinje, is de optoch. Gezellig same op de wage, lekker mitzinge, sjlók aete en netuurlik zo väöl meugelik sjlók goje nao de miense langs de kantj.

Liek 't dich nao 't laeze van dit verhaol leuk óm ouch bie ós te kómme? Óm dich aan te melje, kins se ketak opnumme mit ein van oos leidsters, Monique. Häör mobiele nummer is 06-28863218

Haopelik kinne veer heel väöl nuuj maedjes óntmoete kómmend sezoen!

Groetjes Marit, Elisa en Vienna



# VASTELAOVEND IS VAN DE WAERELD: 11 VASTELAOVESHOTSJPOTS!

*Heg Valkes en Vulinnekkes! Vastelaovend is netuarlik van Remunj, mer auch van de waereld. Det bewies de nuje Kienjermusical waal. Veer höbbe rze verslaaggaever mit de Vul Force One op paad gesjtuurd om 11 plèkke te bezeuke wo ze vastelaovend viere. Reis geer mit?*



## Quebec City, Canada

Boh, wat is 't kaad hie. In Canada waert in de wintjer vastelaovend gevierd mit iesskulpture, sleijriejers en 'ne hele houp sjnee. De kienjer genete van sneejgevechte, ieshokkie en vrolike optochte door de besnijde sjtraote. Leuk, mer waal kaad.



## Santa Cruz de Tenerife, Sjpanje

Oppé Kanarische Eilenj waert vastelaovend gevierd mit 'ne Sjpaanse twist. Hie vinj se parades, dansgezeljappe en verbluffende kestums. De sjtraote zeen gevuld mit meziek en vreugde terwiel miense van alle laeftje same feesviere. Dit jaor is 't thema: tillevisie!



## Oruro, Bolivia

Hie is de vastelaovend waal aeve angere kook. Miense verkleije zich es duvels en ingelkes en danse de bezunjere diablada-danse. Vergaet de Sjolefestasie mer dómpel dich ónger in 'ne mix van tradisjonele meziek en rituele.



## Barranquilla, Colombia

Barranquilla sjteit bekind om ziene broesende vastelaovend vol opzwepende meziek en tradisjonale danse. Eine fissa veur de ganse famielie, wo ederein zich verkleid en same kump óm te genete van de vrolike sfeer.



## Nice, Frankriek

Mesjien bosse waal 'ns op fekansie gewaes in de Franse Riviera. Hie waert vastelaovend gevierd mit kleurrike blomecorso's enindrök-wekkende vuurwerkshows. Ein fees vol elegantie en artistieke expressie, mit kleurrike pralwages die door de sjtraote trèkke.



## Venetië, Italië

Hie lepe veer door sjmaal sjträötjes tösse miense mit mysterieuze maskes in lange jurkachtige gewade. In Venetië dreijt vastelaovend óm mysterie en zuut alles d'r sierlik en geheimzinnig oet.



## Port of Spain, Trinidad & Tobago

Op de eilenj Trinidad & Tobago kump vastelaovend toet laeve mit 'n explosie van kleure, ritmische meziek en sjitterende kostums mit weinig sjtóf mer waal väöl vaere. Bereump is de groepe parade én de supersjnelle socameziek wo nemes op kin blieve sjtilsjaon. Ein Caribisch vastelaovesavontuur!



## Rio de Janeiro, Brazilië

Rio de Janeiro is zónger twiefel de op ein nao beste plek óm vastelaovend te viere. Hie dans men vol sjpektakel de samba door de sjtad. Es of ze al jaore neet meer zo'n fiesta höbbe gehad. Net wie in de Kienjermusical zeen d'r Sambasjole en trèkke grote groepe door de sjtraote. Olé!



## New Orleans, de Verenigde Staten

In 't hert van Louisiana vinj se New Orleans, de toesbasis van de bereume Mardi Gras-vastelaovend. Hie waert de sjtad euverspeuld mit kleurrike maskes, krallekittinge en livemeziek. Geine jeugprins dae 't sjlók van de wage sjmiet, mer waal heel väöl wages wo kralle vanaaf gegoojd waere.



## Kölle, Pruuses (oftewaal Duitslandj)


Hie gaon ze he-le-maoi los mit de Vastelaovend! Miense verkleije zich net wie bie ós in grappige kestums, sjmiete mit sjlók en zinge heel väöl sjone leedjes. Mit de optoch trèkke sjitterende wages door de sjtraote. De dansmarietjes lieke hie meer op acrobate, neet normaal!

## Remunj, Limburg

Veer zeen blie det veer net veur de vastelaovend weer trök zeen in oos eige Remunj. Hie in Remunj is 't toch 't sjoons, mit de Kienjermusical, de Kienjer- en Jeuggarde en de Uulejóniges. Gezellig nao 't Sjnaps-nazebal in 't Witte Kirkske, de Sjolefestatie, 't Bacchusdrieve en de optoch. Verkleij dich wie 'n prinses of eine pliesieman of trèk dich dae bontjas vol sjtikkers aan en zing keihèl mit mit Big Benny. Remunj is net Rio, Rio aan de Roer!



KINS DOE 'T LEEDJE  
**'VASTELAOVEND IS  
VAN DE WAERELD'  
VAN ANGERS DAN  
ANGERS AL MIT  
ZINGE? SCAN DE  
QR-CODE**



# WO HÈLT DE KEMISSIE JEUGPRINSFEESJES ZICH DIT JAOR MIT BEZIG?

EIN KEMISSIE DIE DE LACH OP DE GEZICHE VAN JÓNGE VASTELAOVESVIERDERS TOUVERT.  
VEER ORGANISERE 'T OETROPE, DE RESEPSIE EN 'T AAFTRAEJE VAN DE SJTADSJEUGPRINS.

DE KEMISSIE BESJETT OET 'NE BONTJE MIX VAN UULE, TE WEITE:

- > RALPH BULT OET DE JEUGPRINSKEUZE- EN BEGELEIJINGSKEMISSIE OFWAAL DE JPKBK
- > ROBIN COENEN, YVETTE MEIJS EN CLAIRE LAMBRIEX OET DE AAD DAMESGARDE
- > AAD ADJUDANT JOB MEVISSEN EN MARE VAN HOREN VAN DE KIENJERMUSICAL

EN VEER SJTAON ÓNGER LEIJING VAN SHOSHAN BENJAMIN, DE MODER VAN AAD  
SJTADSJEUGPRINS DANIECK I BROUNS.

't Oetrope van de Sjtadsjeugprins is dit jaor een groot superheljeavontuur. De leje van oos kemissie vinje 't oetrope zelf ouch erg sjappend, want veer weite net wie alle angere feesvierders nog neet waem de nuje Sjtadsjeugprins geit waere. Veer wirke daorom good same mit de kemissie JPKBK (Jeugprinskeuze- en begeleijingskemissie), zodet 't ein ónvergaetlik fees waert!

Eine primäör dit jaor is de verhoezing nao 'ne gloednuje zaal veur 't oetrope. Veur 't eers zal 't oetrope van de Sjtadsprinse van D'n Uul neet meer in de Salle de Fête plaatsvinje, mer in de gans verboewde theaterzaal. Noe dink geer mesjens: huh? Eine theaterzaal, dao kinne de miense toch allein mer zitte? Nou, neet bie D'n Uul in de Oranjerie. De sjeul kinne namelik oet de zaal, wo door d'r zat plaats is veur ederein óm te sjtaon, te danse en te sjpringe. Veer kinne neet wachte óm te óntdekke wie dees nuuj lokasie de feesvreugde zal verhoge.



Mer behalve det veer organiseren, doon sommige van ós ouch nog anger dinger. Zo zólle Mare en Job de Middag van de Nuje Sjtadsjeugprins prizzentere en zal Job ouch nog 't aaftraeje prizzentere én op maondaag es DJ optraeje op 't Sjapsnazebal.

Naeve de sjappende onthulling van de nuje Sjtadsjeugprins sjteit d'r nog väöl meer leuks op 't pergram. Net wie veurig jaor is d'r bie 't oetrope én de resepsie van de Jeugprins eine heuse photobooth, zodet alle feesvierders 'n herinnering aan dees sjoon daag kinne vasligke.

En alle sjókleefhöbbers zeen veer netuurlik zeker neet vergaete... De beruchte sjókkraom zal ouch dit jaor absoluut neet ontbraake bie alle Jeugprinsfeesjes.

De Kemissie Jeugprinsfeestjes geit dit jaor weer zorge veur ein sjetterend vastelaovesfees wo bie plezeer en gezelligheid veur ederein, mer netuurlik veur de jeug van Remunj, 't allerbelangrikste zeen.

Veer höbbe super-giga-mega väöl zin in de Jeugprinsfeesjes van dit jaor en winse ederein eine sjone vastelaovend!

Aad Gardemaedje Claire

# AAN ALLE KIENJER OET REMUNJ OETNEUDICING VEUR DE UULEJACH 2024!

IS 'T EIN VÓSSEJACH? NAE HEUR, VEER GAON DIT JAOR WEER OP ZEUK  
NAO UULE! OP ZAOTERDAAG 20 JANNEWARIE BEGINT OP 'T MUNSTERPLEIN  
DE DERDE EDISIE VAN DE REMUNJSE UULEJACH, EIN VÓSSEJACH MIT 'N  
VASTELAOVESTINTJE!

Tösse 13:30 oer en 15:30 oer zólle d'r in de binnesjadt van Remunj allerlei Uule te vinje zeen en 't is aan uch óm die te gaon vinje. Doe kins mit 'n grüpke kienjer mitdoon en tösse 14:00 oer en 15:00 oer ein sjtempelkaart kómme ophaole op 't Munsterplein. Det kin bie de Kiosk of boete bie Ver'koch. Daonao geis se mit dien grüpke in de binnesjadt op zeuk nao de 11 Uule. Óngerwaeges is d'r van alles te belaeve en kumps se mesjens zelf waal 'ne talente-jager taege...

App dien vrunj en vrundinne en doot mit aan de derde Uulejach. Alle kienjer zeen waalgékomm! Es se sjum bös kumps se verkleid en gesjmink, want d'r zeen sjoon prieze te winne. Doe kins netuurlik ouch mitdoon mit dien klasgenote, dien sjportteam, de vastela-ovesvereniging, dien scouting- of dansgroep of dien kleuternaefkes in de tweelingbuggy! Es se alle sjtempels höbs verzameld, höbbe de Sjtadsjeugprins van D'n Uul en zien adjudante mesjens waal ein hoesorde of 'ne angere pries veur dich.

Veer haope det se mit duis. Toet zaoterdaag 20 jannewarie!

Mit vruntjelike groet,  
Wirkgroep Uulejach  
Sjtadsvastelaovesverening D'n Uul

TOET ZAOTERDAAG  
20 JANNEWARIE!



# DÖBBELINTERVIEW



## SJTADSJEUGPRINS VAN D'N UUL 2024 DEAN I ADAMS



34

### WAAR 'T AL OOJT 'NE DRUIM VAN UCH ÓM PRINS TE WAERE?

Ich wól dit al vanaaf det ich wis waat vastelaovend viere en 'ne prins beteikende.

### HÖB GEER FLOT 'JAO' GEZAG OF MÓS GEER D'R NOC AEVE EUVER NAODINKE?

Ich höb hie altied al van gedruimp en wie me mich vroog leet ich dees kans netuurlik neet veurbie gaon!

### WIE ZEET GEER TOET DE KEUS VAN DE LEJE VAN EUR PRINSELIK GEZELSJAP GEKÓMMÉ?

Miene adju Mees kin ich al vanaaf mien gebaorte en hae is eine van mien beste vrunj. Veer viere altied edere vastelaovend same dus die keus was al heel flot gemaak. Mit mien adju Ada zit ich in de klas, ich kin 'm al vanaaf groep 1. Ouch het is ein van mien beste vrunj, veer kinne same väöl lache en kuite, 't maak oos gezelsjap kómpleet.

### NAO WAAT VEUR IVVENEMENT KIEK GEER 'T MEISTE OET?

't Oetrope, want dan hove veer nieks meer geheim te haje. (Meister Joris is noe al de hele tied aan 't vesse of ich de nuje prins waer. Ich sjtaon op sjool bekind as 'ne echte vastelaovesgek en hae haet dus 'n vermoede det ze mich gevraog kóste höbbe. Heel lastig óm dan edere keer weer e sjtaole gezich op te zitte.) En de sjolefestasie, óm veur al die sjoon verkleijde miense te sjtaon. En dan d'n optoch, lekker sjlók goje!

### GAOT GEER 'T MISSE ÓM MIT AL EUR VRUNJ VASTELAOVEND TE VIERE?

Nae, netuurlik neet want ich höb mien beste vrunj naeve mich sjtaon

### WAAT VINJT GEER 'T MEIST BEZÓNJR ÖNGERDEIL VAN EUR PRINSEPAK?

De korte poefbóks, want ich loup 't ganse jaor door al in 'n korte bóks

### WAAT WILT GEER DE LAEZERS VAN DEZE UULEWAPPER NOC LAOTE WEITE?

Det veer d'r same ein groot fees van gaon make en det 't 'n super sjiek, cool sezoen waert.

## SJTADSPRINS VAN D'N UUL 2024 JOEP I SEUREN



**WAAR 'T AL OOJT 'NE DRUIM VAN UCH ÓM PRINS TE WAERE?** Es ich gans eerlijk bön is 't altied waal 'ne sjtieke me mer neet ech oetgesjpraoke druim gewaes. Önger de vastelaovend es ich dan in 'n kefee sijing en de Prins van Sjtadsvastelaovesvereniging D'n Uul mit zien ganse gevolg kwaam binne, dan waas det altied get sjpesjaals. Dan bekroop mich det geveul van - det zól toch ins 'ne keer sjoo zeen! - zeker waal ins. En ouch waal dökker dan ins. Ein dink is zeker: ich höb d'r de aafgeloupe tied 'ne houp euver gedruipl!

**HÖB GEER FLOT 'JAO' GEZAG OF MÓS GEER D'R NOC AEVE EUVER NAODINKE?** Ich höb nao 'n nach tegooj prakkezere - én nao goodkeuring van 't toesfrón - 'jao' gezag. Mer ich dink det de veurzitter van de PKBK al waal medein aan mien ouge kós zeen det't waal good zoot.

**WIE ZEET GEER TOET DE KEUS VAN DE LEJE VAN EUR PRINSELIK GEZELSJAP GEKÓMMÉ?** Ich höb 't gelök det ich 'ne geweldige bandj höb mit mien breurkes. Zo wiej det dan waal ins geit in de kefee ónger de vastelaovend, höbbe veer jaore geleje aafgesjpraoke det es eine van ós gevraog zól waere, veer det in eder geval mit oos drieje zólle doon. Oze derde adjudant is oze beste kammeraad en ich vinj 't óngeluiflik sjoo óm de vastelaovend op dees meneer ouch mit hem te moge deile.

**NAO WAAT VEUR IVVENEMENT KIEK GEER 'T MEISTE OET?** De nach van de Nuje. Veer höbbe d'r same maonje nao toegewirk en zeen heel benuujd nao de reaksie van oos femielie, vrunj en netuurlik de Remunjse vastelaovesvierders. Én netuurlik ouch nao de middaag van de Nuje Sjtadsjeugprins, ich bön heel benuujd nao waem det geer zeet!

**GAOT GEER 'T MISSE ÓM MIT AL EUR VRUNJ VASTELAOVEND TE VIERE?** Doe höbs mer eine keer in dien laeve 't gelök om Prins van Sjtadsvastelaovesvereniging D'n Uul te waere en det is netuurlik supersjpesjaal! Mer gans eerlik: jao, 'n bietje waal, want juus 't sjpeel same mit vrunj ónger de vastelaovend vinj ich erg sjiek! Aan de angere kant is 't heel gaaf om zoväöl nuuj miense te lere kinne en nuje vastelaovesvrunj te make.

**WAAT VINJT GEER 'T MEIST BEZÓNJR ÖNGERDEIL VAN EUR PRINSEPAK?** Det is een lastige vraog... D'r zeen netuurlik zoväöl sjoo elemente aan mien pak, zo wie de scepter, de móts, de kraakwitte maillots, de geweldig sjoo cape mit 't waope van oos sjoo sijad Remunj, mer veur mich is 't Prinsekruuts toch waal heel sjpesjaal. Det is gans veur mich perseunlik gemaak en zól ich de res van mien laeve heel greuts drage.

**WAAT WILT GEER DE LAEZERS VAN DEZE UULEWAPPER NOC LAOTE WEITE?** Of det se noe jónk, aad, diek of dun bös en egaal wo det se vanaaf kumps maak pleezer, geneet van de sjooone meziek en kiek dien ouge oet nao al die sjoo versierde vastelaovesvierders. En veural vier de vastelaovend zo hel es se kins! En es veer ós op miene verjördaag 11 fibberwarie taegekómme dan zólle veer d'r same eine (cola of sinas) op drinken.



35



kleine

# Sleepover Jeuggarde: pizza-sjimink aovendj!

Tradisiegetrouw haef de Jeuggarde ooch afgeloupe sezoen weer 'ne sleep-over georganiseerd. Deze keer hobbé ze zicht sjoon gesjimink en hobbé ze de aovend aafgesjaloote mit 'ne lekkere pizza. Wils se zelf ooch zo sjoon gesjimink waere mit de vastelaovend? Volg den ongersitaonde sjitappe:



Sjtap 1

Maak 'ne basis in 't midden mit wit en kies den nog twee kleure, de basis brings se mit 'n sjpun-ske aan.



Sjtap 2

Maak mooie krulle mit de penseel.



Sjtap 3

Gaef dien winkbrauwe 'n kleur en bring get ougsjeem (oogschaduw) aan op dien uig. Maak versiersels aan de krulle. Mit dien kweske maak se 'n saort blaedjes/bleumkes.



Sjtap 4

Zit witte sjtippe op de krulle.



Sjtap 5

Zit zjwarre sjtipkes op de krulle en V-tjes op de naas.



"Finishing touch"

- Lippesjtif
- Wimpers
- Glitterspray



## KOLOFÓN

### Kemissieveurzitter

Hein Jambroers

### Riddaksie

Frits Criens  
Luuk Hendriks  
Marjo Peeters

### Mit dank aan

Sjtadsjeugprins Dean I Adams  
Sjtadsprins Joep I Seuren  
Vórs Dirk I Franssen  
Karin Straus  
Freek van Empel  
Monique Sijben  
Marijn van Etten - Baars  
Renée Tobben - Willemse  
Joost Houben  
Claire Lambriex  
Hans Geurts  
De Kienjergarde  
De Jeuggarde  
De hoofrolsjpelers oet de Kienjermusical  
Big Benny  
Danny Pouwels

### Fotoos

De femielies van de Sjtadsprinselike gezelsjappe  
De Kienjergarde en de Jeuggarde  
De Kienjermusical  
Shoshan Benjamin  
Hoffotograaf Jos Aben  
Foto Studio Bongers  
De riddaksieleje

### Oetgaaf

Sjtadsvastelaovesvereniging D'n Uul  
Posbos 11, 6040 AA Remunj

### Vórmgaeving

Marjo Peeters, ontwerpburo M  
[www.ontwerpburom.nl](http://www.ontwerpburom.nl)

### Drök


ARS Printmedia

### Ketak

[www.dn-uul.nl](http://www.dn-uul.nl)

### @ 2023

Alle sjrieversrechte mit betrèkking toet de inhald van dees oetgaaf waere oetdrökkelik veurbehaje. Dees rechte berôste bie Sjtads-vastelaovesvereniging D'n Uul Remunj ofwaal bie de betreffende sjriever.





# Sjone Vastelaovend!

Tijdens carnaval gaan uw bankzaken gewoon door. Daarom kunt u online 24 uur per dag veel bankzaken zelf regelen. Ook kunt u ons telefonisch bereiken via (088) 722 66 00.